



REPUBLIKA E SHQIPËRISË  
ENTI RREGULLATOR I ENERGJISË  
BORDI

VENDIM

Nr. 55, Datë 29.03.2022

MBI  
MOS FILLIMIN E PROCEDURËS PËR LICENCIMIN E SHOQËRISË “DUFERCO  
SHQIPËRIA” SH.P.K., NË VEPRIMTARINË E TREGTIMIT TË ENERGJISË  
ELEKTRIKE

Në mbështetje të nenit 16 dhe nenit 37, pika 2, gërma “d”, të ligjit nr. 43/2015, “Për sektorin e energjisë elektrike”, i ndryshuar; nenit 4, pika 1, gërma “e”, nenit 5, pika 1, gërma “e”, nenit 10, pikat 1 dhe 3, të Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike, të miratuar me vendimin e bordit të Entit Rregullator të Energjisë (ERE), nr. 109, datë 29.06.2016, e ndryshuar; si dhe nenit 19, pika 1, gërma “a”, të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s nr. 96, datë 17.06.2016, bordi i ERE-s në mbledhjen e tij të datës 29.03.2022, mbasi shqyrtoi relacionin me nr. 406/1 prot., datë 24.03.2022, të Drejtorisë së Licencimit, Autorizimeve dhe Mbikqyrjes, “Mbi fillimin e procedurës për licencimin e shoqërisë “Duferco Shqipëria” sh.p.k., në veprimtarinë e tregtimit të energjisë elektrike”,

**Konstatohet se:**

- Shoqëria “Duferco Shqipëria sh.p.k., me shkresën e protokolluar në ERE me nr. 314 prot., datë 25.02.2022, ka paraqitur aplikimin për t’u pajisur me licencë në veprimtarinë e tregtimit të energjisë elektrike.
- Me shkresën e protokolluar në ERE me nr. 314/1 prot., datë 09.03.2022, shoqëria “Duferco Shqipëria” sh.p.k. ka dokumentuar kryerjen e pagesës së aplikimit për t’u pajisur me licencë në veprimtarinë e tregtimit të energjisë elektrike, sipas Aneksit A, të “Rregullores për procedurat e licencimit, modifikimit, transferimit të plotë/të pjesshëm dhe rinovimit të licencave”, e ndryshuar.
- Duke marrë parasysh edhe pagesën e aplikimit të kryer nga shoqëria konform rregullores u vijua shqyrtimi i dokumentacionit të depozituar në ERE së fundi.
- Në zbatim të “Rregullores për procedurat e licencimit, modifikimit, transferimit të plotë/të pjesshëm dhe rinovimit të licencave”, e ndryshuar, aplikanti duhet të depozitojë në ERE:

Formatin dhe dokumentacionin për aplikim; Dokumentacionin juridik, administrativ dhe pronësor; Dokumentacionin financiar dhe fiskal dhe Dokumentacionin teknik për aktivitetin tregtimit të energjise elektrike. Sa rezulton nga ky aplikim shoqëria ka përcjellë dokumentacionin e kërkuar si më poshtë:

- Formati dhe dokumentacioni për aplikim. Neni 9, pika 1, gërmat “a”, “b”, “c”. **Plotësuar;**
- Dokumentacioni financiar dhe fiskal. Neni 9, pika 3, gërmat “b”, , “d”. **Plotësuar;**
- Dokumentacioni teknik për aktivitetin tregtimit të energjisë elektrike. Neni 9, pika 4.8, gërmat “a”, “b”, “c”. **Plotësuar.**

Në lidhje me mungesën e dokumentacionit që ka të bëjë me:

- Dokumentacionin juridik, administrativ dhe pronësor. Neni 9, pika 2
  - gërmat “a”/“b” (akti i themelimit/statuti). Shoqëria duhet të paraqesë Aktin e Themelimit dhe Statutin e saj në gjuhën shqipe në përputhje me përcaktimin e nenit 8, pika 3, të rregullores së licencimit.
  - gërma “c” (Vërtetim për regjistrimin dhe ekstrakt historik nga Qendra Kombëtare e Biznesit QKB). Shoqëria duhet të përcjellë në ERE Certifikatën e Regjistrimit pranë QKB-së.
  - gërma “d” (vertetimi nga Prokuroria dhe Gjykata për përfshirje ose jo në një proces penal të drejtuesve të shoqërisë); Shoqëria duhet të përcjellë në ERE Vërtetimet e Gjykatës dhe Prokurorisë për vetë shoqërinë, administratorin e saj dhe dy përfaqësuesit ligjorë me autorizim, me data të rifreksuara sipas parashikimit në nenin 8, pika 3 të rregullores citojmë se: “...ndërsa vërtetimet dhe deklaratat nga organe e tjera duhet të jenë lëshuar jo më parë se 1 muaj nga momenti i paraqitjes së aplikimit”. Saktësojmë se: Vërtetimi i Prokurorisë pranë Gjykatës së Shkallës së parë Tiranë për shoqërinë “Duferco Shqipëria” sh.p.k mban datën 03.02.2022 dhe është jashtë afatit të vlefshmërisë sikurse cituar në rregullore; Vërtetimi i Gjykatës së Rrethit Gjyqësor Tiranë për shoqërinë “Duferco Shqipëria” sh.p.k. mban datën 10.01.2022 dhe është jashtë afatit të vlefshmërisë sikurse cituar në rregullore; Vërtetimi i Gjykatës së Rrethit Gjyqësor Tiranë për administratorin e shoqërisë “Duferco Shqipëria” sh.p.k. mban datën 17.01.2022 dhe është jashtë afatit të vlefshmërisë sikurse cituar në rregullore..
  - gërma “e” (Struktura e ndërtimit dhe funksionimit administrativ të shoqërisë, sipas pozicioneve dhe profileve përkatëse). Shoqëria duhet të depozitojë Strukturën e ndërtimit dhe funksionimit të saj.
- Dokumentacioni financiar dhe fiskal., Neni 9, pika 3,

- gërma “a” (Vërtetim për shlyerjen e detyrimeve tatimore dhe detyrimeve ndaj Institucionit të Sigurimeve Shoqërore (për shoqëritë e sapokrijuara vërtetim që nuk ka detyrime).
  - Shoqëria ka paraqitur Vërtetim për shlyerjen e detyrimeve tatimore që mban datën 17.02.2022 dhe në zbatim të nenit 8, pika 3 të rregullores, ky vërtetim është brenda afatit të vlefshmërisë sikurse cituar në rregullore dhe shoqëria “Duferco Shqipëria” sh.p.k rezulton se nuk ka asnjë detyrim tatimor të papaguar deri në datën e lëshimit të këtij vërtetimi, por mungon vërtetimi për shlyerjen e pagesave të sigurimeve shoqërore.
  - gërma “c” (Dokumenta që vërtetojnë aftësinë dhe/ose mbështetjen financiare të aplikuesit, ku shprehen qartë vlerat monetare për financim dhe struktura e financimit (financim i vetë aplikuesit, kredi bankare, donacion, të tjera).  
Shoqëria ka paraqitur në ERE vërtetimin nr. 615, datë 23.02.2022, nga një Bankë e nivelit të dytë mbi balancën e depozitave, pranë kësaj banke, por duhet të depozitohet informacion mbi aftësinë paguese dhe mbështetjen financiare të saj.
- Dokumentacioni teknik për aktivitetin e tregimit të energjisë elektrike. Neni 9, pika 4.8
  - gërma “b” (kapitali financiar i parashikuar për ushtrimin e këtij aktiviteti). Shoqëria duhet të bëjë me dije se cili është kapitali financiar që vendos në dispozicion të veprimtarisë së tregimit të energjisë elektrike, Për sa i përket mungesës në dokumentacion u konstatua se mungesat janë kryesisht të njëjta si dhe në aplikimet e tjera që shoqëria “Duferco Shqipëria” sh.p.k. ka depozituar në ERE me shkresën nr. 447 prot., datë 14.02.2020, nr. 447/2 prot., datë 28.05.2020, nr. 314/1 prot., datë 09.03.2022, e të konstatuara edhe në vendimet nr. 48/2020, nr. 86/2020, nr. 140/2020 dhe në vendimin nr. 264/2020.
  - Shoqëria “Duferco Shqipëria” sh.p.k. në zbatim të parashikimit të nenit 10, pika 7, të *“Rregullores për procedurat dhe afatet për dhënie, modifikimin, transferimin, rinovimin dhe heqjen e licencave në sektorin e energjisë elektrike”*, mund të paraqesë një aplikim të ri brenda 1 (një) muaji nga marrja e vendimit të ERE-s për mosfillimin e procedurës dhe dokumentacioni i paraqitur në aplikimin e mëparshëm do të konsiderohet i vlefshëm edhe për aplikimin e ri.

Për gjithë sa më sipër, bordi i ERE-s,

### **Vendosi:**

1. Të mos fillojë procedurën për licencimin e shoqërisë “Duferco Shqipëria” sh.p.k., në veprimtarinë e tregimit të energjisë elektrike, për një afat 5 vjeçar.

2. Në rast se shoqëria do të paraqesë një aplikim të ri, brenda 1 (një) muaji nga marrja dijani e këtij vendimi të bordit të ERE-s, dokumentacioni i paraqitur nga shoqëria për qëllime të rinovimit të licencës do të konsiderohet i vlefshëm.
3. Drejtoria e Licencimit, Autorizimeve dhe Mbikqyrjes të njoftojë aplikuesin për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t'i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi, apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETARI**

**Petrit AHMETI**